



საქართველოს მთავრობის ბანკარბულება

№ 2304 2018 წლის 4 დეკემბერი ქ. თბილისი

2019 წლის განმავლობაში სატრანსპორტო საშუალებების დაზღვევის მომსახურების სახელმწიფო შესყიდვის კონსოლიდირებული ტენდერების საშუალებით განხორციელების თაობაზე

1. „სახელმწიფო შესყიდვების შესახებ“ საქართველოს კანონის 20² მუხლის შესაბამისად, 2019 წლის განმავლობაში სატრანსპორტო საშუალებების დაზღვევის მომსახურების სახელმწიფო შესყიდვის განსახორციელებლად, სახელმწიფო შესყიდვების ერთიანი ელექტრონული სისტემის მეშვეობით ჩატარდეს კონსოლიდირებული ტენდერები.

2. „სახელმწიფო შესყიდვების შესახებ“ საქართველოს კანონის 19¹ მუხლის შესაბამისად, სატრანსპორტო საშუალებების დაზღვევის მომსახურების 2019 წლის კონსოლიდირებულ ტენდერებში სატენდერო წინადადების წარდგენისათვის საფასური განისაზღვროს 10 000 ლარის ოდენობით, ხოლო იმ შემთხვევაში, თუ კონსოლიდირებული ტენდერი შეწყდება ან დასრულდება უარყოფითი შედეგით, აღნიშნულიდან არა უგვიანეს 60 კალენდარული დღის განმავლობაში, განმეორებით გამოცხადებულ კონსოლიდირებულ ტენდერში შეწყვეტილ ან უარყოფითი შედეგით დასრულებულ კონსოლიდირებულ ტენდერში მონაწილე პრეტენდენტისთვის სატენდერო წინადადების წარდგენის საფასური განისაზღვროს 1000 ლარის ოდენობით.

3. საჯარო სამართლის იურიდიულმა პირმა – სახელმწიფო შესყიდვების სააგენტომ უზრუნველყოს სატრანსპორტო საშუალებების დაზღვევის მომსახურების 2019 წლის კონსოლიდირებული ტენდერების სატენდერო დოკუმენტაციების პროექტების მომზადება და კონსოლიდირებული ტენდერების ჩატარებისათვის კანონმდებლობით დადგენილი სხვა აუცილებელი სამართლებრივი და ორგანიზაციული ღონისძიებების განხორციელება.

4. სატრანსპორტო საშუალებების დაზღვევის მომსახურების 2019 წლის- კონსოლიდირებული ტენდერების ჩატარებისა და აღნიშნული ტენდერების შემდგომი ადმინისტრირების მიზნით, შეიქმნას სატრანსპორტო საშუალებების დაზღვევის მომსახურების 2019 წლის კონსოლიდირებული ტენდერების სატენდერო კომისია, დამტკიცდეს მისი თანდართული შემადგენლობა და საქმიანობის წესი.

პრემიერ-მინისტრი

ქ. ნახევრიანი



მამუკა ბახტაძე

დამტკიცებულია
საქართველოს მთავრობის
2018 წლის 4 დეკემბრის
№2304 განკარგულებით



**სატრანსპორტო საშუალებების დაზღვევის მომსახურების 2019 წლის
კონსოლიდირებული ტენდერების სატენდერო კომისიის შემადგენლობა და
საქმიანობის წესი**

1. სატრანსპორტო საშუალებების დაზღვევის მომსახურების 2019 წლის კონსოლიდირებული ტენდერების სატენდერო კომისია (შემდგომში – სატენდერო კომისია) შექმნილია სატრანსპორტო საშუალებების დაზღვევის მომსახურების 2019 წლის კონსოლიდირებული ტენდერების ჩატარებისა და მათი შემდგომი ადმინისტრირების მიზნით.

2. ბაზრის კვლევის შედეგებზე დაყრდნობით, კონსოლიდირებული ტენდერის თავისებურებებიდან და საბიუჯეტო სახსრების რაციონალური ხარჯვის პრინციპიდან გამომდინარე, სატენდერო კომისია უფლებამოსილია, ამ განკარგულების პირველი პუნქტით განსაზღვრული ვადის განმავლობაში ჩაატაროს ერთი ან რამდენიმე კონსოლიდირებული ტენდერი.

3. სატენდერო კომისიის შემადგენლობაში შედიან:

ლევან რაზმაძე – სსიპ – სახელმწიფო შესყიდვების სააგენტოს თავმჯდომარე – სატენდერო კომისიის თავმჯდომარე;

ილია ბეგიაშვილი – საქართველოს რეგიონული განვითარებისა და ინფრასტრუქტურის მინისტრის მოადგილე – სატენდერო კომისიის თავმჯდომარის მოადგილე;

ალექსანდრე დარახველიძე – საქართველოს მთავრობის ადმინისტრაციის უფროსის მოადგილე – სატენდერო კომისიის თავმჯდომარის მოადგილე;

ლერი ბარნაბიშვილი – საქართველოს ფინანსთა მინისტრის მოადგილე – სატენდერო კომისიის წევრი;

გიორგი ბუთხუზი – საქართველოს თავდაცვის მინისტრის მოადგილე – სატენდერო კომისიის წევრი;

ნათელა თურნავა – საქართველოს ეკონომიკისა და მდგრადი განვითარების მინისტრის მოადგილე – სატენდერო კომისიის წევრი;

ლევან კაკავა – საქართველოს შინაგან საქმეთა მინისტრის მოადგილე – სატენდერო კომისიის წევრი;

ნოდარ ხადური – სსიპ – კონკურენციის სააგენტოს თავმჯდომარე – სატენდერო კომისიის წევრი;

ვასილ ჯანჯღავა – საქართველოს იუსტიციის სამინისტროს ეკონომიკური დეპარტამენტის უფროსი – სატენდერო კომისიის წევრი.

4. სატენდერო კომისიას ხელმძღვანელობს სატენდერო კომისიის თავმჯდომარე, მისი არყოფნის შემთხვევაში – თავმჯდომარის დავალებით მისი ერთ-ერთი მოადგილე, ხოლო მოადგილეების არყოფნისას, თავმჯდომარის დავალებით – სატენდერო კომისიის ერთ-ერთი წევრი.

5. სატენდერო კომისიის ნებისმიერი გადაწყვეტილება უნდა აისახოს სატენდერო კომისიის შესაბამის სხდომის ოქმში, რომელსაც ხელს აწერს კომისიის ყველა დამსწრე წევრი.

6. სატენდერო კომისიის სხდომა უფლებამოსილია, თუ მას ესწრება სატენდერო კომისიის წევრთა სიითი შემადგენლობის ნახევარზე მეტი. სატენდერო კომისიის სხდომაზე გადაწყვეტილება მიიღება კომისიის დამსწრე წევრთა ხმათა უმრავლესობით, მაგრამ არანაკლებ სიითი შემადგენლობის ხუთი წევრისა.

7. სატენდერო კომისიის წევრი, რომელიც არ ეთანხმება სატენდერო კომისიის გადაწყვეტილებას, უფლებამოსილია, წერილობით წარადგინოს

თავისი აზრი, რომელიც უნდა დაერთოს სატენდერო კომისიის გადაწყვეტილებას.

8. ორგანიზაციული და ტექნიკური ტიპის ან/და ხელშეკრულების შესრულების პერიოდში მიმდინარე საკითხებთან დაკავშირებით, რომლებიც არ საჭიროებენ სატენდერო კომისიის სხდომის მოწვევას, კომისიის მიერ გადაწყვეტილება შესაძლებელია, მიღებულ იქნეს კონსოლიდირებული ტენდერების მენეჯმენტის ctd.spa.ge სისტემის ან carinsurance2019@spa.gov.ge ელექტრონული ფოსტის მეშვეობით. აღნიშნული საშუალებებით გამოხატული პოზიცია ან/და მიღებული გადაწყვეტილებები წარმოადგენს იურიდიული ძალის მქონე დოკუმენტებს.

9. სატენდერო კომისიის ორგანიზაციულ საქმიანობას უზრუნველყოფს საჯარო სამართლის იურიდიული პირი – სახელმწიფო შესყიდვების სააგენტო.